



EM 2017/15

25/9-2017

Randi Vestergaard Evaldsen

Naalakkersuisut siulittaasuata ammaanermi oqalugiaataa

(Naalakkersuisut Siulittaasuut)

Nunatsinni massakkoqqissaaq pissutsit atuuttut aallarniutigilaarniarpakka:

- Aningaasaqarnikkut siuariatorneq 7 procentit missaanniippoq, torrak!
- Suliffissaaleqisut suli ikiliartorput, nuanneq!
- Aatsaat taama amerlatigisut ilinniartuutigaagut naammassisarlutillu, kusanaq!
- Aalisarnermik suli allit aningaasarsiorluarput, ajunnginnerusinnaangilaq!

Massakkorpiaq inissisimaneq eqqarsaatigalugu oqarusuttoqarsinnaavoq ingerlaneq kusanarluinnartuusoq. Ilaa iluarusunnaq? Ilaa nuanneq?

Ajornartorsiulli piviusorlu tassaapput massakkorpiaq pisut tatigineqarsinnaanngimmata. Siunissamut ungasinnerusumut qiviartariaqarpugut piumagutta piumanngikkaluaruttaluunniit. Taava suut tamarmik kusanarpallaarunnaariataartarput ersernerlussillutillu, tamannalu piviusuuvoq piumagussi piumanngikkaluarussiluunniit.

Ilumoortormi unaavoq, siuariatorneq qaffassissoq aalisarnerullu iluani aningaasarsiorluarneq pissuteqarmata massakkorpiaq qaleruallit aalisakkallu nunarsuarmi akigissaarnerannik - misilittakkallu tamarmik takutippaat, akit qaffattarlutillu appartartut, tamanna nutaaliaanngilaq. Taamaattuminguna oqartuartugut, aningaasanut inatsiserput aalisarnerup kisimi napatitarissanngikkaa, assigiinngitsunilli aningaasarsiorfeqarnissaq pisariaqarluinnartuusoq.

Ilumoorpoq suliffissaaleqisut ikiliartormata, kisianni suli amerlapput sulilersinnaanngitsut, taamaattumik suli pisariaqarpoq sulisussanik avataaniik tikisitsisarnissarput immikkoortuni amerlasuuni, tamanna annernarpoq oqaatigissallugu, piviusorli taamaappoq. Nunatsinni Naatsorsueqqissaartarfiup kisitsisaatai nutaat naapertorlugit suliffissaaleqisut affaasa missaat suliffimmik paarsinnaanngillat. Tamanna ajorluinnarpoq.

Aap, ilinniagaqalersartut amerliartorput, nunanulli naligerusutatsinnut naleqqiulluta suli ikipallaarujussuarput. Sulili ajorneruvoq - ilinniarsimassutsip 2040-mi qaffasissusissaa pillugu taggiinerup takutimmagu, taamanikkussamut suli nunanut allanut naleqqiulluta kinguarsimanerussasugut inuiaqatigiit ilinniarsimassutsip qaffasissusaa naliginnaasooq



eqqarsaatigalugu. Tamanna ajorpoq, eqqarsarnarlunilu. Taamaakkaluartoq Naalakkersuisuniit aalajangiunneqarpoq piffissami tulliuutuni iliuuseqassanngitsugut, taava kikkut uani akigineqarpat? Meerartagut, siunissarput, uagut inuiaqatigiit.

Uangut politikkeritut suliassarput ersarikkaluqaq artornassarli. Sinaakutissanik pitsaanerpaamik pilersitsisariaqarpugut inuiaqatigiit pitsaanerup tungaanut ingerlasinnaaqqullugit. Aalisarnikkut, peqqinnissakkut, inunnik isumaginninnikkut, aningaasarsiornikkut, inuussutissarsiornikkut, ilinniartitaanikkut aamma allatigut sutigut tamatigut. Politikikkut isumaqatigiittuaannangilagut, taamaakkaluartoq pisussaaffigaarput ilungersuutigissallugu inuiaqatigiit ilorraap tungaanut ingerlatinnissaat tamatumalu pinissaanut sinaakutissat pitsaanerpaat pilersissallugit.

Maannakkut pissutsit qiviarutsigit oqartariaqarpugut nassuerutigisariaqarparpullu kukkusimalluta. Tikkuartuinaangilanga oqarlunga kina tamatumunnga akisussaansoq, erseqqissarusupparali Inatsisartut Naalakkersuisullu ukiorpassuarni eqqarsarnerluppallaarsimasut. Inatsisartut Naalakkersuisullu piffissaagallartillugu ukiorpassuarni iliuuseqartarsimannngillat tamannalu piffissaq ungasinnerusoq isigalugu akisoorujussuannngortussaavoq, massakkummi takussutissat ersarereerput. Taamaattumik pingaaruteqarluinnarpoq nalorniunnaarnissarput paarlattuanilli iliuuseqartalerluta. Kalaallit Nunaata siunissaanut apeqqutaalluinnarpoq uagut politikkerit sulilluarnerulernissarput pilersillugillu aqqissuusseqqinnerit, pitsaaliuunerit allannngortiterinerillu, aamma aap; tamanna nuannertuaannarnaviannngilaq. Innuttaasut ilaannut tamanna annernassaaq. Aamma suliat annerpaartaat nuannarineqarnaviannngillat, kisianni pisariaqarput. Eqqaamassavarput politikkerit sapiissusillit silatuullu piffissaagallartillugu iliuuseqartarput. Piumagutta piumannikkaluaruttaluunniit piviusup arlaanni angujumaarpaatigut taamaasippallu ingammik suna tamarmi nuanniillissaaq, annernarnerulissaaq, ingallutalu nuannarineerutissaaq. Uani annermik eqqaarsaatigaakka inuiaqatigiinnik tungiuinermi ajorseriaatissat annertoorsuit, assersuutigalugu peqqinnissaqarfimmi, ilinniartitaanermi, utoqqarnik isumassuinermi iluini, taakkualu assersuutiinnaapput, suli ajorseriaatit allat ilaapput. Aamma inuiaqatigiit piareersimaffigisariaqassavaat suli akileraarnerulernissartik, isertitakittuniit isertitaqqortunerpaanut. Tamakku piumaarput Naalakkersuisut taakkulu tunuliaqutaat nangaajuassappata.

Aaqqissuusseqqinnerit massakkut!

Inuiaqatigiit siunissamut qularnaarsarnissaat qangali aallartereersimasariaqaraluarpoq, mannali tikillugu annerusumik iliuuseqarnikuunngilagut. Utoqqalinersiat siusinaartumillu pensionisiat pillugit iluarsartuussinikuuvugut, sallunanga oqassaguma, iluarsartuussinerit ilumoortutut oqaatigineqarsinnaannngillat. Taamaallaammi sukut tamaana allannngortiterillatsiarnikuuvugut. Tamatumalu kingunerinikuuaa immikkoortuni taakkunani ingerlatsinermut aningaasartuutit qaffanneqarneri. Suliassat annertuut taamatut iluarsiivigineqarneq ajorput - suliassat artornartortaanik asuli kinguartiterineruvoq. Assersuutigalugu agguaqatigiisillugu inuuneqqortusiartorneq ilutigalugu utoqqalinersiaqalernissamut ukiut amerliartornissaat pilersaaruteqarfingngilarput.



Taamaattumik Demokraatiniit kissaatigaarput, aaqqissuusseqqinnerit eqqortut aallartissagigut aammalu siunnersuuteqarfigerusupparput suminggaanniik aallartissinnaanersugut Iluarsartuussinerit tamakkiisumik tunngaveqartariaqarput, annertuunik iluarsartuussinerit isertitanik aningaasartuutinillu nassataqartarput. Aamma pisariaqarpoq, siunissami unammillernartut allangortissagutsigit.

Aallaqqaammut ilinniartitaanikkut, inuussutissarsiornikkut, akileraartarnikkut aamma inunnik isumaginnikkut aaqqissuusseqqittariaqarpugut.

Ilinniartitaaneq

Ilinniartitaanikkut nalorninata ataatsimoorluta aalajangiisariaqarpugut, meeqqat atuarfianni iluarsisassat tamanit pingaarnepaasut. Meeqqat atuarfiani atuartut ataasiakkaat ilinniaqqinnissaminnut tunngavissaminnik pissarsisarput aamma tassani inuiaqatigiittut ukiorpassuarni pisussaaffigut naammassinikuunngilagut. Maani Kalaallit Nunaanni, Danmarkimut, Sverigemut, Norgemut, Finlandimut Islandimullu naleqqiulluta ilinniartitaanermut aningaasat amerlanerusut atortarpagut, ajoraluartumilli tamanna inernerusartuni takuneqarsinnaanngilaq, tassani nunanut taaneqartunut naleqqiulluta sulii kinguarsimaneroqaagut.

Suliassami annertuumi tassani aaqqiissutissaqanngilaq pisariitsunik, aaqqiissutissalli ajornerpaartaraat assagut sarliaannassallugit oqaannarnissaq:

”Ilinniartitaanermut aningaasarpasuit atortarpagut”

Imaassinnaavoq aningaasarpasuit atortarigut, kisianni pitsaanerusumik torrallaanerullutalu atortariaqarpagut. Qulakkeertariaqarparput meeqqat atuarnernannut attuumassuteqartut tamarmik meeqqap atuarnernanut suleqataanerunissaat. Tassa angajoqqaat, ilinniartitsisut, atuarfimmi aqutsisut, atorfilittat, politikerillu. Kikkut tamarmik assigiimmik anguniagaqartariaqarput meeqqat atuarfiat ima pitsaatigileqqullugu allaat atuartut tamarmik soraarummeertalersillugit atuaqqinnissaminnut ajukkunnarunnaarsillugit. Anguniagaq minnerussanngilaq.

Tamatumali kinguneranik ilinniartitsisunngorniartarneq malunnartumik pitsanngorsartariaqarparput aamma ilinniaqqittarnerit. Atuartitsinerimi sinaakkutissat pitsaasut qulakkeertariaqarpagut assersuutigalugu IT-mik atuineruneq aqutigalugu aammalu alimasissumik atuartitsineq. Atuarfiit angajoqqaanik akuutitsinerusariaqarput, siusinaarluni iliuuseqartoqarsinnaalersillugu, ajornartorsiortoqalissagaluarpat. Aamma angajoqqaat isumagisariaqarpaat qitornamik atuariatortarnissaat qaarsilaarlutik piareersarluarsimallutillu kiisalu taquarlutik.

Piginnaasat qaffassarneqassapput. Imaassappalli tuluttut imaluunniit matematikkimi ilinniartitsisunik piginnaaneqarluartunik tikisitsisariaqassasugut, taava tamanna isumagisariaqarparput. Imaassinnaavoq akisunerusoq aappaatigulli iliuuserisinnaasatsinni pitsaanerpaasussaavoq, ilinniarsimassutsikkut qaffassaaneq siuariartornissamut,



atugarissaarnerulernissamut tungiuilluarnissamullu aqquataamat pitsaanerpaq. Ajoraluartumillu Naalakkersuisut takusimarpasinngilaat pissutsit qanoq ilungersunartiginerat. 2018-mut Aningaasanut Inatsisissatut siunnersuummi taamaallaat atuarneqarsinnaavoq, ilinniartitaanerup iluani pingaarutilinnik aalajangiinissamut ilinniatitaaneq ataqatigiinneruleqqullugu iluarsartuussinissaq utaqqineqassasoq. Piareersarluni suliassartaa siusinnerpaamik 2019-mi piariissaaq taamaasillunilu politikikkut aalajangiinertassai aatsaat 2010-mi imaluunniit 2021-mi pisinnaassapput. Arraa, Naalakkersuisunaa; meerartagut taama sivisutigisumik utaqqisissinnaanngilagut. Tamatta imaaliallaannaq takusinnaavarput pisariaqarluinnartoq massakkorluinnaq iliuuseqarnissaq meeqqat aturfiani piginnaasat pitsanngorsarniarlugit - utaqqisariaqanngilagut aamma utaqqisinnaanngilagut 2021-p tungaanut.

Inuussutissarsiorneq

Sinaakkutissat eqqortut pilersittariaqarpagut suliffiit pioreersut aallarnisaasartullu nutaat tunisassiornerat qaffassarumallugu. Tamatumani timmisartunut suluusalinnut mittarfissat sananeqartussat suliniutaapput pitsaasut. Kingunerissavaalu kalaallit tunisassiaannik pisariinnerusumik sukkanerusumillu avammut tunisassiorsinnaalernissaq peqataanillu inuussutissarsiorlut nunat allamiut minnerunngitsumillu takornariat nunatsinnukarsinnaalissapput pisariinnerusumik akikinnerusumillu.

Taamaasilluni atlantiku qulaallugu timmisartunut Nuummi Ilulissanilu mittarfissat inuiaqatigiinnut aningaasaliinerupput pitsaasut. Kisianni ingerlaqqittariaqarpugut. Allatut ajornartumik suliffiit allatut ajornartumik isertitaannik amerlanerusunik arsaartorunnaartariaqarpagut pisariaqartitaminnut aningaasaliilluarnerusinnaaqqullugit piffissaq qaninnerusoq isigalugu suliffinnik amerlanerusunik pilersitsisussanik taamaasillutalu aamma akileraarutigut amerlisillugit. Taamaattumik ingerlatseqatigiiffiit akileraarutaat malunnartumik appartittariaqarpoq - aamma qularnaarumallugu nunaqavissut suliffiutaasa sullivinnut nunani allaneersunut unammillersinnaanerulernissaat.

Inuussutissarsiorneq ingerlalluartoq pisariaqarluinnarpoq suliffiit akileraarutillu qularnaarumallugit. Aalisarnerup kusanartunik sinaakkuteqarnissaa qularnaarniaruassavarput aalisarnikkut siuttuunerput piginnarumallugu. Ilaatigulli pisariaqarpoq pikkorinnerulernissarput aalisagaatitsinnik aqutsinermi. Siusinnerusukkut assagiarsunnik saarullinnillu aalisapilunnikuuvugut aammalu asserpiaannik qaleralinniarnaq misigisaqartilparput. Taamaasilluni Qeqertarsuup Tunuani qaleralinniarnaq ajalusooriaannanngornikuuvuq. Biologit innersuussutaannut tusarnaallaqqissinerusariaqarpugut. Piffissaq ungasinnerusoq isigalugu maannakkutut annertuallaanik pisassiisarneq piffissaq ungasinnerusoq isigalugu nunatsinnut ajoqusiissaaq.

Akileraartarneq

Demokraatit tunngaviusumik isumaqarput, innuttaasut nammineq aningaasaatimik amerlanersaat pigiinnartassagaat. Inuit aningaasarsiorlut soorunami akissarsiamik amerlanersaat pigiinnartariaqarpaat, allaqqussinnaanngilaq. Soorunami akileraartassaagut tamatta



anigaaserivitsinnut, ilaatigut innuttaasunut neqeroorutigisinnaajumallugit ilinniartitaaneq pitsaasoq, peqqissutsikkut kiffartuussineq pitsaasoq aammalu inunnik isumaginninneq pitsaasoq. Kisianni pingaaruteqarluinnaqqissaarpoq, innuttaasut suliffiillu malugisinnaasariaqarmassuk eqiasuinneq sulilluernerlu akilersinnaasut. Tamanna silatusaarneruvoq aqutissatuaallunilu "inuiaqatigiit naligiinnerusut pilersinnissaannut" Naalakkersuisut akuttunngitsumik oqartarnerattut. Kaasarfimmioqarnerulernavianngilagummi oorinik kaasarfiup aappaaniit aappaanut nuunnerisigut, aamma tamanna eqqortuunngilluinnarpoq.

Tamanna tunngavigalugu pingaaruteqarpoq akileraartarnikkut pingaarutilimmik allannortiterinissarput,. Oqaatigeriikkattuut ingerlatseqatigiiffiit akileraarutaat appartariaqarpoq. Demokraatit tamanna pillugu matumani ataatsimiinnermi siunnersuuteqarumaarpugut aamma neriuppugut partiit allat siunnersuuterput ilalerumaraat.

Inuinaat akileraarutaat eqqarsaatigalugit pingaaruteqarpoq siunertariuassagatsigu sulinerup imminut akilersinnaajuarnissaa aamma sulineruneq imminut akilersinnaasariaqarpoq.

Taamaattumik siullermik qularnaartariaqarparput sulinermi akissarsiat ikiuutisiallu assigiinngissutaasa annertunerulernissaat. Tassani assigiinngitsunik iliuuseqarsinnaavugut. Atuutsilersinnaavarput sulinermut ilannga atorneqartussaq inunnit sulisartunit. Tassa imaappoq inuit pisortat ikiorsiissutaannik pisartagallit kajumissuseqarnerulissapput sulilernissaminnut.

Aamma inunnik isumaginninnermi ikiorsiissutit assigiinngitsut qissimittariaqarpagut. Naammattumik annertussuseqarpat imaluunniit appaallanneqarsinnaappat? Sukumiisumik misissortariaqarput.

Kisianni qanorluunniit oqalukkaluarutta suli amerlavallaaqaat isumaqartut suligunik sulinnikkaluarunilluunniit assigiittoq.

Tamatuma saniatigut ilungersuutigalugu oqaatigissavarput Naalakkersuisut akissarsiaqqortunernut immikkut akileraartitsisalerniarnerat isumaqatiginngilluinnaratsigu. Inuiaqatigiit inuit ullut tamarluinnaasa akunnerpassuarni sulisartunut pillaaqataarusunngilagut. Inuit tamakku allanut naleqqiullutik akileraarnikkaanipilussuupput. Naapertuilluernerunngilaq taakku qinnuigissallugit suli akileraarnerusariaqartut. Imaassinnaavoq ullut tamarluinnaasa suleruluttut taakku sulerusussuseerutsillugit nukissaarutsillugillu, taamaassappat inuiaqatigiit ataatsimut isigalugit tunisassiornerat appariassaaq. Akissarsiaqqortunerit immikkut akileraartittalernissaata allatut oqaatigalugu piitsuunerulersissavaatigut tamannalu anguniarneqanngisaannassaaq. Paarlattuanik anguniartariaqarpoq tamatta akimanerulernissarput.

Inunnik isumaginninneq

Meerartagut siunissaraagut aamma inersimasutut pisussaaffigaarput isumagissallugu pitsaasumik meeraanissaat. Sualummik angajoqqaat immikkut tamatumunnga pisussaaffeqarput aammali



perorsaasut, ilinniartitsisut allalu. Aliasulluinnartarpunga soorlu Meeqqat Illersuisuata imaluunniit Inunnik Isumaginninnermut Naalakkersuisoqarfiup nakkutilliisoqarfiata meeqqanik sumiginnaaneq pillugu nalunaarusiaa atuaraangakku.

Meeqqat amerlavallaqaat sumiginnarneqartartut aamma kinguaassiutitigut atonerlunneqartartut. Aanali suli ajornerusq; sumiginnarneqartarput angajoqqaaminnit pisortaqarfinnit aamma inuiaqatigiinnit. Allatut ajornartumik sulilluernerusariaqarpugut. Meeqqat pisariaqartitaat angajoqqaat pisariaqartitaannit ataqqinerusariaqarpagut. Allatut ajornartumik maannamut naleqqiullugu akuerisariaqarparput pisortani oqartussaaffiit paasissutissanik allattugaatinillu avitseqatigiissinnaanngornissaat. Maannamut naleqqiullugu sullissineq sukkanerusariaqarpoq. Kinguarsaanigut tamaasa meeraq ikiortarialik ilaginnartarparput. Ilumut taamaasinnaava? NAAMERLUINNAQ!

Demokraatiniit nalunngilarput suliniartoqareersoq annertoorujussuarmik - takusinnaavarpulli suliniutit pitsaanerpaanngitsut taamaattumillu allarpassuarnik iliuuseqartoqartariaqartoq. Taamaattumik soqutiginassaaq tusassallugu Inunnik Isumaginninnermut Naalakkersuisoq sunik aallartitsiniarnersoq suliniuteqarniarnersorlu immikkoortumi tassani? Tusarusunngilakka uteqattaarneqartuartartut meeqqanngooq amerlanersaat toqqissisimapput ajoratillu. Tamanna nalunngilara aamma nuannaarutigaa. Meerarpassuilli atugarliortut tamatumap iluaqusersinnaanngilai. Tusarusuppara suut suliniutiginerisi? Suut eqqarsaatigineqarpat? Iliuuseqartariaqarpugummi. Iliuuseqartariaqarpugut aamma Demokraatiniit piareersimavugut immikkoortumi suleqataanissatsinnut.

Naalakkersuisut siulittaasuata ammaanermi oqalugiaataa

Maannakkulli sassavara Naalakkersuisut siulittaasuata tallimannngormat manna ataatsimiinneq ammarlugu oqalugiaataa.

Demokraatiniit ernumanartutut isigaarput, Naalakkersuisut oqalugiaamma aallaqqaataani oqarmat, siumut isigisinnaasugut isumalluarluta. Tamanna ilumuunngilaq. Maannakkut sammivik atuarneqartoq naapertorlugu takusinnaavarput aningaasarsiorneq sakkortuumik ajorseriartussaasoq tamatumalu kinguneranik tunguineq ajorseriarumaartoq. Tamatuma saniatigut ilinniartitaanerup iluani maannakkut sammivik atuarneqartoq naapertorlugu takusinnaavarput ilinniarsimassuseq malunnartumik ajorseriarumaartoq nunani avannarlerni nunanut suleqatitsinnut naleqqiulluta. Tamanna Demokraatiniit isumalluarnartutut isiginngilluinnarparput - ernumanarluinnartutummi isigaarput. Taamaamat Naalakkersuisutuulli ajoraluartumik uagut isumalluunngilagut, qunuginngilarpullu piviusoq oqaatigissallugu.

Paarlattuanilli nuannersutut isigaarput Naalakkersuisut Siulittaasuata iluarsartuussisoqarnissaa annertuumik kissaatigimmagu. Tassungalu atatillugu Demokraatiniit oqaatigisariaqarparput, ilumoortumik iluarsartuussillutalu allannngortiterisariaqartugut - kusassaaginnarata ajoraluartumik takukulavallaakkatsit.



Demokraatiniit nuannaarutigaarput Naalakkersuisut oqalugiaammuni ilinniartitaaneq sammingaatsiarmagu tamatumunngalu imatut akerliunngilluinnarpugut. Oqaatigeriikkatsitulli isumaqaannarpugut ingerlaneq arriippallaartoq. Naalakkersuisut utaqqineranni atuartut ilaqtartussaapput meeqqat atuarfiani ingerlalluannngitsunik naak ingerlalluarnersinnaagaluarlutik. Sukkanerusemik aallartittariaqarpugut.

Attaveqaateqarneq eqqarsaatigalugu Demokraatiniit Naalakkersuisut siulittaasuut isumaqatigaarput oqarmat timmisartunut sulusalinnut mittarfinnik talliliinissat nunatsinnut iluaqusiiumaartut. Taamaakkaluartorli imatut apereruseppugut:

- Ammaalluni oqalugiaammuni erserpoq Naalakkersuisut Siulittaasuata naatsorsuutigigaa, Nuummi, Ilulissani Qaqortumilu mittarfinnik sanaartorneq 2018-mi aallartinneqarumaartoq Demokraatinili ilisimasagut naaportorlugit aningaasalersuinissaq suli inisseqqissaarneqanngilaq taamaattumillu imaariaannaavoq sanaartornermut aningaasartuutit pisariaqanngitsumik akisunerulerumaartut, suliat ataatsikkut aallartinneqassappata. Naalakkersuisut tamanna qanoq isumaqarfigaat? Tamatuma saniatigut Demokraatiniit isumaqarpugut piffissanngortoq Naalakkersuisut ammasumik unneqqarillutillu oqaatigisariaqaleraat Kangerlussuarmi Narsarsuarmilu timmisartunut sulusalinnut mittarfiit qanoq pineqassanersut, Nuummi Ilulissalu atlantiku qulaallugu timmisartunut mittarfittaassat atulerpata.

Demokraatit Naalakkersuisut Siulittaasuattulli pissanganartutut isigaarput aalisarnermut inatsisissap suliarilernissaa. Isumaqatigiinniarnissanut qilanaarpugut. Aamma nuannaarutigaarput, Naalakkersuisut Siulittaasuata oqalugiaammuni siunnummagu biologit tusarnaarlularnerusalernissaq qalerallit appallu pineqartillugit. Kinguaassagummi taakkunannga kalaallit mamartuutaannik aalisarlutillu aamma piniarsinnaasariaqarpugut.

Naalakkersuisut Siulittaasuata inuussutissarsiorneq takornariaqarnerlu iserfigai. Ajoraluartumilli ilanngussai imaqarpiangillat. Suliniutit uani taaneqartut imartorsuaq kinguneqarnaviangillat. Demokraatiniit tusarusupparput Naalakkersuisut suniarnersut ingerlatseqatigiiffiit akileraarutaannut aallarnisaasartunullu pitsaanerusemik atugaqalernissaannut. Aamma sukumiisumik ilisimasaqarfilerusukkaluarparput Naalakkersuisut qanoq iliorlutik takornarianik amerlisaaniarnersut. Tassani Demokraatit isumaqarpugut, aningaasaliinitsialaassagaluartoq Visit Greenland nukittorsarneqartuuppat, tassani sulisut pikkorissut takornarianut pilerisaarivissuarni Kalaallit Nunaat ussasaarutigineruseinnaaniassammassuk.

Naalakkersuisut Siulittaasuattulli nuannaarutigaarput, aatsitassarsiorneq aallartinniamisaalermat. Ineriartornermut soqutiginnilluta malinnaassaagut, aatsitassaaticut ullumimut naleqqiullugu annerungaartumik iluanaarutigineqartariaqarmata.

Demokraatini iluarisimaarparput Naalakkersuisut Siulittaasuata avatangiisit illersormagit. Nalunngilarput tamanna ilungersuutigigaa politikkit ingerlanneqartumi tamanna takuneqarsinnaavoq. Tamanna pillugu qutsavigeruseppatsigit.



Inissaqarniarneq eqqarsaatigalugu Naalakkersuisut suliniutaasa isumaqatigiinniutiginissaannut qilanaarpugut. Tassani pingaarnertut isumaqarpugut, sapinngisamik amerlanerpaat nammineq pigisaminnik illutaartariaqartut tamannalu anguniarumaarparput.

Inunnik isumaginninnermi peqqissaqarnermilu iluarisimaarparput Naalakkersuisut Siulittaasuata nassuerutigimmagu inuiaqatigiittut suli annertoorsuarnik suliassaqtugut. Alloriarnermi siullermi ajornartorsiutit ilu Moornerat nassuerutigissavarput - tullianilu iluarsiniassaagut. Ukiuni amerlavallaani politikerit imminnut salloqittaqattaarnikuupput oqalullutik inunnik isumaginninnermi suliassat ilorraap tungaanut ingerlasut. Tamanna Demokraatinit ajortutut isigaarput - suliaq pimoorullugu tigorussupparput qularnaarumallugu inuit ikiortariallit ikiorneqarnissaat - minnerunngitsumik meeqqat pillugit. Naalakkersuisut suliniutinik sunik aallartitsiniarnersut tusassallugu qilanaaraarput.

Peqqinnissaqarfimmut tunngatillugu Naalakkersuisut Siulittaasuata imigassamut inatsisissaq nutaaq oqaatigaa ingerlaannarlu oqaatigerussupparput; allannguutissat annertuut nerrivimmut qaqqinneqaqqaartariaqarput Demokraatit inatsit akueralugu taaseqataassappata. Ussasaarutit inerteqqutaalernissaat imigassaarniarnermilu ammasarfiillu sivikillinissaat inatsimmi marluupput kukkulluinnartutut isigisagut.

Tassunga killikkallarpunga aallaqqaammut oqaaseqarninni. Ullumi oqallinnissatsinnut qilanaarpunga aamma matuma ataatsimiinnerup sinnerani.